



Prime de partence in ostarie

Cjamine leterarie

Une “cjamine leterarie” sot des stelis e “per agros”, ven a stâi pai cjamps. Lunis ai 27 di Jugn un public numerôs al à podût gjoldi di une esperience inusuâl, cjaminant tra i prâts stabii di Basaldiele, cjalant stelis e lusingnis e scoltant il cjant dal gri e lis leturis di **Christian Romanini**. Si è sierade cussì la presentazion dal libri “Sul Troi di Aquilee” (edizions Glesie Furlane www.glesiefurlane.org e www.facebook.com/Glesie-Furlane) che al conte i prins 70 chilometri, sui 210 complessifs, dal ‘Cammino Celeste’ (www.camminoceleste.eu) intun diari che al cjape drentri i cuatri dis che l’autôr al à fat a pît di Barbane a Madone di Mont.

Dopo de introduzion de gjornaliste **Paola Beltrame**, dut il public al à lassât la storiche ostarie di Cavicj par inviâsi

Dopo une introduzion dal libri di Christian Romanini in ostarie, il public al à cjaminât tra i prâts stabii di Basaldiele.

bande il Cormôr “Stant che il cjaminâ al è un dai temis principâi dal libri o ai pensât di proponi chest zîr dulà che o ai let cualchi pagine dal gno libri” al spieghe Romanini “Si pues fâ esperiencis di pelegriac lungjis zornadis o setemanis, ma al è impuartant ancje tornâ a lâ a pît pai nestris país, tant che continuazion di chel cjaminâ ma ancje e soledut par tornâ a scuvierzi i tesours dal teritori che o vin dismenteâts”.

I prâts stabii dal Comun di Cjampfuarmit a son un patrimoni no dome naturalistic, ma ancje storic “Chi si riunive il Parlament de Patrie dal Friûl e il Patriarcje al puartave

in rassegne ancje l’esercit dal Stât patriarcjâl - al à vût dit Romanini - duncje chest país al è leât a fuart cu la storie di dut il Friûl: il teritori al è un element fondamentâl che al forme la culture di un popul che al nas e i vîf parsore”. Sierant l’autôr al à volût ricuardâ ancje la seconde motivazion che lu à sburtât a scrivi il so libri “Chest an, che il Ministeri al à clamât ‘An talian dai cjamins’, al è ancje il decim an di vite dal ‘Cammino Celeste’ e cun chest libri o volarès ancje ringraziâ i voluntaris che lu àn fat nassi tal 2006”.

La cjamine di Basandiele e je stade realizade in colaborazion cu la ‘Ignazio Piussi Onlus’ che e à sede propit li de Ostarie Cavicj, che aromai i appassionâts di escursions a son usâts a clamâle.

✉ redazione@ilfriuli.it

ARLEF PE INFANZIE

‘Flon Flon e musute’, libri, musiche e video

Il libri “Flon Flon & Musute”, la edizion furlane di “Flon Flon & Musette” di Elzbieta, vincidôr dal premi Andersen intal 1996, al devente ancje un biel video animât. La iniziative, prime editoriâl e cumò filmiche, e nas de colaborazion tra la associazion culturâl “El Tomât” di Buje e Agenzie Regionâl pe Lenghe Furlane che le à finanziade.

Il video, de durade di 6 minûts, al è stât ideât di **Leo Virgili** che al à ancje componût e sunât lis musicis; la vòs che e conte e je chê dal atôr **Michele Polo** e lis animazions dai dissens originâi di Elzbieta a son par cure dal regist e videomaker **Francesco Baita**.

La version in lenghe furlane e je stade curade de mestre **Laura Nicoloso** partint dal originâl francês “Flon Flon et Musette” e je stade publicade intal 2015 de Associazion culturâl il Tomât simpri cu la poie de Arlef.

SCOLTADIS DI DRIUS

Une tombe

Les feminis, pai segrêts, son une tombe. Pecjât che ce che ur jentre pe orele ur jessi di bot pe bocje.



Euronews informa

Brexit, Fontanini: “Valorizât il referendum. La nestre Regjon e à di dâ vòs al popul su lis riformis de sanitât e dai ents locâi”

“In Grande Bretagne a son stâts valorizâts l’istitut dal referendum e la volontât populâr che cun chest si esprim. Il Friûl - Vignesie Julie, e in particolâr il so orghin legislatif, il Consei regionâl, che al cjapi esempli e che al dedi vòs ai citadins su la riforme de sanitât, su la istituzion di dôs provinciis autonomis il Friûl e Triest e su la abolizion des Unions teritoriâls intercomunâls. Mi auguri che la maiorance che e guverne cheste Regjon e permeti ai citadins dal Friûl - Vignesie Julie di dî la lôr su riformis che a rivoluzionaran la organizazion de sanitât, ma ancje la articolazion dai ents locâi, cancelant 4 Provinciis sostituidis di 18 mini provinciis”. Lu aferme il president de



Provincie di Udin Pietro Fontanini in relazione ai risultâts dal referendum inglês. “Di là di dâ un segnâl impuartant di cambiament pe Europe, il referendum inglês - al zonte ancjemò Fontanini - al lasse une testimoniance propit sul valôr dal referendum in se. Ancje

se al rapresentave un passaç fundamentâl pe atual maiorance di Guvier britanic, cheste ultime e à permetût al popul di esprimisi. Cumò la volontât di chê comunitât e varà di jessi sodisfate drentri di 2 agns. Cheste sveltece no si viôt, invezeit, intal nestri País: indicatîf il câs Sapade e lis istancis ancjemò no sodisfatis di chê comunitât dopo 8 agns de domande di passaç inte nestre regjon. E in Fvj probabilmèntri no si tignarà la consultazion referendarie par istituî, inte nestre Regjon, lis dôs provinciis autonomis di Friûl e Triest sul model dal Trentin - Sud Tiròl. Un model che al funzione, che al ven di duj laudât e ricognossût pe sò efficienche e virtuosità e ancje pe fuarte difese des

minorancis. Parcè che no domandâur ai nestris citadins cemût che le pensin a rivuart? Forsit parcè che il risultât al preoche e al podarès jessi masse sigûr ven a stâi a pro de propueste e cuintri de gnove gjeografie istituide de maiorance de Regjon. O crôt che riformis di cheste puartade a vedin di passâ pal vôt dai citadins e dopo acetâ il risultât e agjî di consequence”. In merit ai risultâts dal referendum, “il vôt in Grande Bretagne al à di jessi interpretât tant che un avvertiment ae Europe - al zonte Fontanini - che e à di jessi mancul la Europe centraliste, de finance, des masse regulis par duj e su cualsisedi setôr e plui “Europe dai popui” cemût che le pensave ancje pre Checo Placerean”.